

26/06/1998

KLIA: PM naik penerbangan domestik pertama

SEPANG, Khamis - Datuk Seri Dr Mahathir Mohamad akan menaiki penerbangan komersil pertama di Lapangan Terbang Antarabangsa Kuala Lumpur (KLIA) dengan penerbangan ke Langkawi pada jam 7 pagi Selasa ini.

Jurucakap Malaysia Airports Berhad (MAB) berkata, Perdana Menteri akan melawat lapangan terbang itu bermula jam 10 malam Isnin ini dan akan menyaksikan operasi perpindahan peralatan dari Lapangan Terbang Sultan Abdul Aziz Shah ke KLIA.

Dr Mahathir akan turut merasmikan beberapa kedai runcit di Bangunan Terminal Utama dan Terminal Satelit KLIA sebelum ditempatkan di Hotel Transit KLIA.

"Kehadiran Dr Mahathir adalah sebagai `penggerak semangat' kepada kakitangan MAB serta agensi yang bertungkus lumus membuat persediaan pada malam dan pagi hari permulaan operasi lapangan terbang itu," katanya di Pusat Pengurusan Lapangan terbang (AMC) KLIA, hari ini.

Lapangan terbang berharga RM10.5 bilion itu akan dirasmikan Yang di-Pertuan Agong Tuanku Ja'afar pada malam Sabtu ini.

Difahamkan, Dr Mahathir akan menghadiri beberapa program di Pulau Langkawi sebelum pulang ke ibu kota pada kira-kira jam 5 petang hari yang sama.

Jurucakap MAB berkata, Perdana Menteri akan menyaksikan perbarisan konvoi lori pengangkut yang terbabit dalam operasi pemindahan besar-besaran peralatan dari Subang di lobi ketibaan MTB.

(END)